

M. TULLII CICERONIS
DE
FINIBVS BONORVM
ET MALORVM
AD
B R V T V M
LIBER I.

NON eram nescius, Brute, cum, quæ sum. I
mis ingeniis, exquisitaque doctrina philosophi
Græco sermone tractavissent, ea Latinis litteris
mandaremus, fore, ut hic noster labor
in varias reprehensiones incurreret. Nam qui-
busdam, & iis quidem non admodum indoctis,
totum hoc displicet; philosophari. Quidam
autem non id tam reprehendunt, si remissius
agatur: sed tantum studium, tamque multam
operam ponendam in eo non arbitrantur.
Erunt etiam, & hi quidem eruditi Græcis
litteris, contemnentes Latinas, qui se dicant
in Græcis legendis operam malle consumere.
Postremo aliquos futuros suspicor, qui me ad
alias litteras vocent: genus hoc scribendi,
et si fit elegans, personæ tamen & dignitatis

2 esse negent. Contra quos omnes dicendum
breviter existimo. quamquam philosophiae
quidem vituperatoribus satis responsum est
eo libro, quo a nobis philosophia defensa &
collaudata est, cum esset accusata & vitu-
perata ab Hortensio. qui liber cum & tibi
probatus videretur, & iis, quos ego posse
judicare arbitrarer; plura suscepi, veritus ne
movere hominum studia viderer, retinere
non posse. Qui autem, si maxime hoc pla-
ceat, moderatius tamen id volunt fieri, diffi-
cilem quandam temperantiam postulant in
eo, quod semel admissum coerceri reprimique
non potest; ut propemodum justioribus uta-
mur illis, qui omnino avocent a Philosophia,
quam his, qui rebus infinitis modum con-
stituant, in reque eo meliore, quo major
3 sit, mediocritatem desiderent. Sive enim
ad sapientiam perveniri potest; non paranda
nobis solum ea, sed fruenda etiam est. sive
hoc difficile est; tamen nec modus est ullus
investigandi veri, nisi inveneris; & quærendi
defatigatio turpis est, cum id, quod quæ-
ritur, sit pulcherrimum. Etenim si delecta-
mur, cum scribimus; quis est tam invidus,
qui ab eo nos abducatur? si laboramus; quis
est, qui alienæ modum statuat industriæ?

Nam, ut Terentianus Chremes non inhuma-
nus, qui novum vicinum non vult

*Fodere, aut arare, aut aliquid ferre
denique:*

non enim illum ab industria, sed ab illiberali
labore deterret: sic isti curiosi, quos offendit
Moster minime nobis injucundus labor.
His igitur est difficilius satisfacere, qui se 2
Latina scripta dicunt contemnere: in quibus 4
hoc primum est, in quo admirer, cur in
gravissimis rebus non delectet eos patrius
sermo, cum iidem fabellas Latinas, ad ver-
bum de Græcis expressas, non invitî legant.
Quis enim tam inimicus pœne nomini Romano
est, qui Ennii Medeam, aut Antiopam Pa-
cuvii spernat, aut rejiciat? qui se iisdem
Euripidis fabulis delectari dicat, Latinas litte-
ras oderit? Synephebos ego, inquit, potius
Cæcilii, aut Andriam Terentii, quam utram-
que Menandri legam? A quibus tantum 5
dissentio, ut, cum Sophocles vel optime
scriperit Electram, tamen male conversam
Attilii mihi legendam putem. de quo Licinius,
*Ferreum scriptorem: verum, opinor, scri-
ptorem tamen, ut legendus sit. rudem enim
esse omnino in nostris poetis, aut inertissimæ
segnitiae est, aut fastidii delicatissimi. Mihi*

quidem nulli satis eruditii videntur, quibus nostra ignota sunt. An,

Utinam ne in nemore - - -
nihilominus legimus, quam hoc idem Græcum. Quæ autem de bene beateque vivendo a Platone disputata sunt, hæc explicari non placebit Latine? Quod si nos non interpretum fungimur munere, sed tuemur ea, quæ dicta sunt ab iis, quos probamus, eisque nostrum judicium & nostrum scribendi ordinem ad jungimus; quid habent, cur Græca anteponant iis, quæ & splendide dicta sint, neque sint conversa de Græcis? Nam si dicent, ab illis has res esse tractatas; ne ipsos quidem Græcos est cur tam multos legant, quam legendi sunt. Quid enim est a Chrysippo prætermissum in Stoicis? legimus tamen Diogenem, Antipatrum, Mnesarchum, Panætium, multos alios, in primisque familiarem nostrum Posidonium. Quid Theophrastus? mediocremente delectat, cum tractat locos ab Aristotele ante tractatos? quid Epicurei? num desistunt de iisdem, de quibus & ab Epicuro scriptum est, & ab antiquis, ad arbitrium suum scribere? Quod si Græci leguntur a Græcis, iisdem de rebus alia ratione compositis; quid est, cur nostri a nostris non

legantur? Quamquam si plane sic verterem ³ Platonem, aut Aristotelem, ut verterunt nostri poëtæ fabulas; male, credo, mererer de meis civibus, si ad eorum cognitionem divina illa ingenia transferrem. sed id neque feci adhuc, nec mihi tamen, ne faciam, interdictum puto. Locos quidem quoſdam, si videbitur, transferam, & maxime ab iis, quos modo nominavi, cum inciderit, ut id apte fieri possit; ut ab Homero Ennius, Afranius a Menandro solet. Nec vero, ut noster Lucilius, recusabo, quo minus omnes mea legant. Utinam effet ille Persius! Scipio vero, & Rutilius multo etiam magis! quorum ille judicium reformidans, Tarentinis ait se, & Consentinis, & Siculis scribere. Facete is quidem, sicut alias: sed nec tam docti tunc erant, ad quorum judicium elaboraret, & sunt illius scripta leviora, ut urbanitas summa appareat, doctrina mediocris. Ego autem quem timeam lectorem, cum ad te, ne Græcis quidem cedentem in Philosophia, audeam scribere? Quamquam a te ipso id quidem facio provocatus gratissimo mihi libro, quem ad me *de virtute* misisti. Sed ex eo credo quibusdam usu venire, ut abhorreant a Latinis, quod incl-

derint in inculta quædam & horrida, de male Græcis Latine scripta deterius. quibus ego assentior, dummodo de iisdem rebus ne
9 Græcos quidem legendos putent. Res vero bonas, verbis electis, graviter ornateque dictas, quis non legat? nisi qui se plane Græcum dici velit: ut a Scævola est prætore salutatus Athenis Albucius. quem quidem locum cum multa venustate & omni sale idem Lucilius; apud quem præclare Scævola,

*Graecum te, Albuci, quam Romanum,
atque Sabinum.*

*Municipem Pontii, Tritanni, centurionum,
Praeclarorum hominum, ac primorum,
signiferumque,*

*Maluisti dici. Graece ergo praetor Athenis,
Id quod maluisti, te, cum ad me accedis,
saluto:*

*Xaipe, inquam, Tite: lictores, turma
omnis, cohorsque,*

*Xaipe, Tite: hinc hostis mi Albucius, hinc
inimicus.*

10 Sed jure Mucius. Ego autem satis mirari non queo, unde hoc sit tam insolens domesticarum rerum fastidium. Non est omnino hic docendi locus: sed ita sentio, & saepe differui, Latinam linguam non modo non
inopem

Inopeim, ut vulgo putarent, sed locupletior
rem etiam esse, quam Græcam. Quando
enim, nè nobis dicam, aut oratoribus bonis,
aut poetis, postea quidem quam fuit quem
imitarentur, ullus orationis vel copiosæ,
vel elegantis ornatus defuit? Ego vero, cum
forensibus operis, laboribus, periculis, non
deseruisse mihi videar præsidium; in quo a
populo Romano locatus sim; debo profecto,
quantumcunque possim, in eo quoque elabo-
rare, ut sint opera, studio, labore meo do-
ctiores cives mei, nec cum ipsis tantoper
pugnare, qui Græca legere malint (modo le-
gent illa ipsa, nec similent) & iis servire;
qui vel utrisque litteris uti velint, vel, si
suas habent, illas non magnopere desiderent.
Qui autem alia malunt scribi a nobis, æqui
esse debent, quod & scripta multa sunt, sic
ut plura nemini e nostris, & scribentur for-
tasse plura, si vita suppetet: & tamen qui
diligenter hæc, quæ de philosophia litteris
mandamus, legere assueverit, judicabit nul-
la ad legendum his esse potiora. Quid est enim
in vita tantopere quærendum, quam cum
omnia in philosophia, tum id, quod his li-
bris quæritur, quid sit finis, quid extremum;
quid ultimum, quo sint omnia bene viven-

di recteque faciendi consilia referenda? quid sequatur natura, ut summum ex rebus expectendis? quid fugiat, ut extremum malorum? qua de re cum sit inter doctissimos magna dissensio, quis alienum putet ejus esse dignitatis, quam mihi quisque tribuit, quid in omni munere vitæ optimum & ¹² rissimum sit exquirere? An, *Partus ancillæ fitne in fructu habendus*, differetur inter principes civitatis, P. Scævolam, M'. Manilium? ab hisque M. Brutus dissentiet, quod & acutum genus est, & ad usus civium non inutile; nosque ea scripta, reliquaque ejusdem generis, & legimus libenter & legemus; hæc, quæ vitam continent omnem, negligentur? Nam, ut sint illa vendibiliora, hæc uberiora certe sunt. quamquam id quidem licebit iis existimare, qui legerint. Nos autem hanc omnem quæstionem de finibus bonorum & malorum ¹³ re a nobis explicatam esse his litteris arbitramur, in quibus, quantum potuimus, non modo quid nobis probaretur, sed etiam quid a singulis philosophiæ disciplinis diceretur, persecuti sumus.

5 Ut autem a facillimis ordiamur, prima veniat in medium Epicuri ratio, quæ plerisque notissima est: quam a nobis sic intellges

expositam, ut ab ipsis, qui eam disciplinam probant, non soleat accuratius explicari. Verum enim invenire volumus, non tanquam adversarium aliquem convincere. Accurate autem quondam a L. Torquato, homine omni doctrina erudito, defensa est Epicuri sententia de voluptate; a meque ei responsum, cum C. Triarius, in primis gravis & doctus adolescens, ei disputationi interesset. Nam 14 cum ad me in Cumanum salutandi causa uterque venisset, pauca primo inter nos de litteris, quarum summum erat in utroque studium; deinde Torquatus: Quoniam nacti te, inquit, sumus aliquando otiosum, certe audiam, quid sit, quod Epicurum nostrum, non tu quidem oderis, ut fere faciunt, qui ab eo dissentient, sed certe non probes, eum, quem ego arbitror unum vidisse verum, maximisque erroribus animos hominum libavisse, & omnia tradidisse, quæ pertinerent ad bene beataque vivendum: sed existimo, te, sicut nostrum Triarium, minus eo delectari, quod ista Platonis, Aristotelis, Theophrasti orationis ornamenta neglexerit. Nam illuc quidem adduci vix possum, ut ea, quæ senserit ille, tibi non vera videantur. Vide 15 quantum, inquam, fallare, Torquate. ora-

348 DE FINIB. BONOR. ET MALOR.

tio me istius philosophi non offendit. Nam & complectitur verbis, quod vult; & dicit plane, quod intelligam: & tamen a philosopho, si afferat eloquentiam, non asperner; si non habeat, non admodum flagitem. Re mihi non æque satisfacit, & quidem locis pluribus. sed quot homines, tot sententiæ. falli igitur possumus. Quamobrem tandem, inquit, non satisfacit? te enim judicem æquum puto: modo, quæ dicat ille, bene no-
 16 ris. Nisi mihi Phædrum, inquam, menti-
 tum, aut Zenonem putas (quorum utrum-
 que audivi, cum mihi nihil sane præter se-
 dulitatem probarent) omnes mihi Epicuri
 sententiæ satis notæ sunt. atque eos, quos
 nominavi, cum Attico nostro frequenter au-
 divi; cum miraretur ille quidem utrumque,
 Phædrum autem etiam amaret: quotidieque
 inter nos ea, quæ audiebamus, confereba-
 mus: neque erat unquam controversia, quid
 • 6 ego intelligerem, sed quid probarem. Quid
 igitur est, inquit? audire enim cupio, quid
 non probes.

17 Principio, inquam, in physicis, quibus
 maxime gloriatur, primum totus est alienus.
 Democrito adjicit, perpaucā mutans, sed ita,
 ut ea, quæ corrigere vult, mihi quidem de-

pravare videatur. Ille atomos, quas appellat, id est, corpora individua, propter soliditatem censet in infinito inani, in quo nihil nec summum, nec infimum, nec medium, nec ultimum, nec extremum sit, ita ferri, ut concursionibus inter se cohærescant; ex quo efficiantur ea, quæ sint, quæque certantur, omnia: eumque motum atomorum nullo a principio, sed ex æterno tempore intelligi convenire. Epicurus autem, in quibus sequitur Democritum, non fere labitur. quamquam utriusque cum multa non probo, tum illud in primis, quod, cum in rerum natura duo quærenda sint, unum, quæ materia sit, ex qua quæque res efficiatur; alterum, quæ vis sit, quæ quidque efficiat: de materia differuerunt, vim & causam efficiendi reliquerunt. sed hoc commune vitium: illæ Epicuri propriæ ruinæ. Censet enim, eadem illa individua & solida corpora ferri suo deorsum pondere ad lineam: hunc naturalem esse omnium corporum motum. Deinde ibi-¹⁸ dem homo acutus, cum illud occurreret, si omnia deorsum e regione fermentur, &, ut dixi, ad lineam, nunquam fore, ut atomus altera alteram posset attingere; itaque attulit rem commentitiam: declinare dixit ato-

150 DE FINIB. ET BONOR. MALOR.

num perpulum; quo nihil posset fieri minus. ita effici complexiones, & copulationes, & adhæsitationes atomorum inter se: ex quo efficeretur mundus, omnesque partes mundi, quæque in eo essent. Quæ cum res tota facta sit pueriliter, tum ne efficit quidem quod vult. nam & ipsa declinatio, ad libidinem fingitur, (ait enim declinare atomum sine causa; quum nihil turpius physico, quam fieri sine causa quidquam dicere;) & illum motum naturalem omnium ponderum, ut ipse constituit, e regione inferiorem locum pentium, sine causa eripuit atomis: nec tamen id, cuius causa hæc fixerit, affecutus est. Nam si omnes atomi declinabunt, nullæ unquam cohærescent: sin aliæ declinabunt, aliæ suo nutu recte ferentur; primum erit hoc quasi provincias atomis dare, quæ recte, quæ oblique ferantur: deinde eadem illa atomorum, in quo etiam Democritus hæret, turbulenta concursio hunc mundi ornatum efficere non poterit. Ne illud quidem physici est, credere aliquid esse minimum, quod profecto nunquam putavisset, si a Polyæno, familiari suo, geometriam discere maluisset, quam illam etiam ipsum dedocere. Sol Democrito magus videtur, quippe ha-

mini erudito, in geometriaque perfecto. huic bipedalis fortasse; tantum enim esse censet, quantus videtur, vel paulo aut majorem, aut minorem. Ita quæ mutat, ea corrumpit;²¹ quæ sequitur, sunt tota Democriti. Atomi, inane, imagines, quæ idola nominant, quorum incurssione non solum videamus, sed etiam cogitemus: infinitio ipsa, quam ἀπειπλαν vocant, tota ab illo est: tum innumerabiles mundi, qui & oriantur, & intereant quotidie. quæ etsi mihi nullo modo probantur; tamen Democritum laudatum a ceteris, ab hoc, qui eum unum secutus est, nolle vi-
tuperatum. Jam in altera philosophiæ par-⁷ te, quæ est quærendi ac differendi, quæ λογικὴ dicitur, iste vester plane, ut mihi qui-
dem videtur, inermis ac nudus est. tollit de-
finitiones: nihil de dividendo ac partiendo
docet: non, quo modo efficiatur conclu-
turque ratio, tradit: non, qua via captiosa
solvantur, ambigua distinguantur, ostendit.
judicia rerum in sensibus ponit; quibus si se-
mel aliquid falsi pro vero probatum sit, sub-
latum esse omne judicium veri & falsi putat.
[In tertia vero parte, quæ est de vita & mo-²³
ribus, in constitutione finis, nil generosum
sapit atque magnificum.] Confirmat illud

vel maxime, quod ipsa natura, ut ait ille, asciscat & reprobet, id est, voluptatem & dolorem. Ad hæc, & quæ sequamur, & quæ fugiamus, referunt omnia. quod quamquam Aristippi est, a Cyrenaicisque melius liberiusque defenditur; tamen ejusmodi esse judico, ut nihil homine videatur indignius. Ad majora enim quædam nos natura genuit & conformavit, ut mihi quidem videtur. ac fieri potest, ut errem: sed ita prorsus existimo, neque eum Torquatum, qui hoc primus cognomen invenerit, aut torquem illum hosti detraxisse, ut aliquam ex eo perciperet corpore voluptatem, aut cum Latinis tertio consulatu conflixisse apud Veserim propter voluptatem. Quod vero securi filium percusserit, privavisse se etiam videtur multis voluptatibus, cum ipsi naturæ patrioque amori prætulerit jus majestatis atque imperii.

¶ Quid? T. Torquatus, is, qui consul cum Cn. Octavio fuit, cum illam severitatem in eo filio adhibuit, quem in adoptionem D. Sillano emancipaverat, ut eum, Macedonum legatis accusantibus, quod pecunias prætorem in provincia cepisse arguerent, causam apud se dicere juberet, reque ex utraque parte audita, pronuntiaret, eum non talem vi-

deri fuisse in imperio, quales ejus majores fuissent; & in conspectum suum venire vexit; numquid videtur tibi de voluptatibus suis cogitavisse? Sed ut omittam pericula, labores, dolorem etiam, quem optimus quisque pro patria & pro suis suscipit, ut non modo nullam captet, sed etiam prætereat omnes voluptates, dolores denique quosvis suscipere malit, quam deserere ullam officii partem; ad ea, quæ hoc non minus declarant, sed videntur leviora, veniamus. Quid 25 tibi, Torquate? quid huic Triario litteræ, quid historiæ cognitioque rerum, quid poetarum evolutio, quid tanta tot versuum memoria voluptatis affert? Nec tibi illud dixeris: Hæc enim ipsa mihi sunt voluptati; & erant illa Torquatis. Nunquam hoc ita defendit Epicurus: neque vero tu, Triari, aut quisquam eorum, qui aut saperet aliquid, aut ita didicisset. Et, quod quæritur saepe, cur tam multi sint Epicurei: sunt aliæ quoque causæ, sed multitudinem hoc maxime allicit, quod ita putat dici ab illo, recta & honesta quæ sint, ea facere ipsa per se lætitiam, id est, voluptatem. Homines optimi non intelligunt, totam rationem everti, si ita se res habeat. Nam si concederetur, etiam

si ad corpus nihil referatur, ista sua sponte,
& per se esse jucunda; per se esset & virtus,
& cognitio rerum, quod minime ille vult,
26 expetenda. Hæc igitur Epicuri non probo,
inquam. de cetero, velle equidem aut ipse
doctrinis fuisset instructior (est enim, quod
ita tibi videri necesse est, non satis politus
iis artibus, quas qui tenent, eruditi appellantur)
aut ne deterruisset alios a studiis,
quamquam te quidem video minime esse de-
territum.

8 Quæ cum dixissem, magis ut illum pro-
vocarem, quam ut ipse loquerer, tum Tri-
rius leniter arridens, Tu quidem, inquit,
totum Epicurum pæne e philosophorum cho-
ro sustulisti. quid ei reliquisti, nisi te, quo-
quo modo loqueretur, intelligere, quid dice-
ret? Aliena dixit in physicis, nec ea ipsa,
quæ tibi probarentur. si qua in his corrige-
re voluit, deteriora fecit. Differendi artem
nullam habuit. Voluptatem cum summum bo-
num diceret, primum in eo ipso parum vi-
dit: deinde hoc quoque alienum. nam ante
27 Aristippus; & ille melius. addidisti ad ex-
tremum, etiam indoctum fuisse. Fieri, in-
quam, o Triari, nullo pacto potest, ut non
dicas, quid non probes ejus, a quo diffen-

tias. Quid enim me prohiberet Epicureum esse, si probarem, quæ ille diceret? cum præsertim illa perdiscere, ludus esset.

Quamobrem dissentientium inter se reprehensiones non sunt vituperandæ. maledicta, contumeliæ, tum iracundiæ, contentiones, concertationesque in disputando pertinaces, indignæ mihi philosophia videri solent. Tunc 23 Torquatus, prorsus, inquit, assentior. neque enim disputari sine reprehensione, nec cum iracundia aut pertinacia recte disputari potest. Sed ad hæc, nisi molestum est, habeo quæ velim. At me, inquam, nisi te audire vellem, censes hæc dicturum fuisse? Utrum igitur percurri omnem Epicuri disciplinam placet; an de una voluptate quæri, de qua omne certamen est? Tuo vero id quidem, inquam, arbitratu. Sic faciam igitur, inquit: unam rem explicabo, eamque maximam. de physicis alias: & quidem tibi & declinationem istam atomorum, & magnitudinem solis probabo, & Democriti errata, ab Epicuro reprehensa & correcta permulta. Nunc dicam de voluptate: nihil scilicet novi, ea tamen, quæ te ipsum probatum esse confidam. Certe, inquam, pertinax non ero: tibique, si mihi probabis ea,

²⁹ quæ dices, libenter assentiar. Probabo, inquit: modo ista sis æquitate, quam ostendis. sed uti oratione perpetua malo; quam interrogare, aut interrogari. Ut placet, inquam. Tunc dicere exorsus est.

9 Primum igitur, inquit, sic agam, ut ipsi ductori hujus disciplinæ placet: constituam, quid, & quale sit id, de quo quærimus: non quo ignorare vos arbitrer; sed ut ratione & via procedat oratio. Quærimus igitur, quid sit extremum, quid ultimum bonorum: quod, omnium philosophorum sententia, tale debet esse, ut ad id omnia referri oporteat; ipsum autem nusquam. Hoc Epicurus in voluptate ponit, quod summum bonum esse vult; summumque malum, dolorem: ³⁰ idque instituit docere sic: „ Omne animal, „ simulatque natum sit, voluptatem appetere, „ eaque gaudere, ut summo bono: dolorem „ aspernari, ut summum malum, & quan- „ tum possit, a se repellere: idque facere „ nondum depravatum, ipsa natura incor- „ rupte atque integre judicante. „ Itaque ne- „ gat opns esse ratione, neque disputatione, „ quam ob rem voluptas expetenda, fugiendus „ dolor sit. sentir hoc putat, ut calere ignem, „ nivem esse albam, dulce mel: quorum nihil.

oportere exquisitis rationibus confirmari: tantum satis esse admonere. interesse enim inter argumentum conclusionemque rationis, & inter mediocrem animadversionem atque admonitionem: altera occulta quædam & quasi involuta aperiri; altera promta & aperita judicari. Etenim quoniam, detractis de homine sensibus, reliqui nihil est; necesse est, quid aut ad naturam, aut contra sit, a natura ipsa judicari. ea quid percipit, & quid judicat, quo aut petat, aut fugiat aliquid, præter voluptatem, & dolorem? Sunt autem quidam e nostris, qui hæc subtilius ve-
llint tradere, & negent satis esse, quid bonum sit, aut quid malum, sensu judicari; sed animo etiam ac ratione intelligi posse, & voluptatem ipsam per se esse expetendam, & dolorem ipsum per se esse fugiendum. Itaque ajunt hanc quasi naturalem, atque infirmam in animis nostris inesse notionem, ut alterum esse appetendum, alterum aspernandum sentiamus. Alii autem (quibus ego assentior) cum a philosophis compluribus permulta dicantur, cur nec voluptas in bonis sit numeranda, nec in malis dolor, non existimant oportere nimium nos causæ confidere, sed & argumentandum, & accurate dis-

ferendum, & rationibus conquisitis de vo-
10 luptate & dolore disputandum putant. Sed
32 ut perspiciatis, unde omnis iste natus fit er-
ror voluptatem accusantium, doloremque
laudantium, totam rem aperiam; eaque ipsa,
quæ ab illo inventore veritatis, & quasi ar-
chitecto beatæ vitæ dicta sunt, explicabo.
Nemo enim ipsam voluptatem, quia voluptas
fit, aspernatur, aut odit, aut fugit; sed quia
consequuntur magni dolores eos, qui ratiore
voluptatem sequi nesciunt. Neque porro quis-
quam est, qui dolorem ipsum, quia dolor
fit, amet, consectetur, adipisci velit; sed
quia nonunquam ejusmodi tempora incidunt,
ut labore & dolore magnam aliquam quærat
voluptatem. Ut enim ad minima veniam, quis
nostrum exercitationem ullam corporis susci-
pit laboriosam, nisi ut aliquid ex ea commo-
di consequatur? Quis autem vel eum jure
reprehenderit, qui in ea voluptate velit esse,
quam nihil molestiæ consequatur; vel illum,
qui dolorem eum fugiat, quo voluptas nulla
33 pariatur? At vero eos accusamus, & justo
odio dignissimos ducimus, qui blanditiis præ-
sentium voluptatum deliniti atque corrupti,
quos dolores & quas molestias excepturi fint,
occæcati cupiditate non provident; similique

sunt in culpa, qui officia deserunt molitiae animi, id est, laborum & dolorum fuga. & harum quidem rerum facilis est & expedita distinctio. Nam libero tempore, cum soluta nobis est eligendi optio, cumque nihil impediat, quo minus id, quod maxime placeat, facere possimus, omnis voluptas assumenda est, omnis dolor repellendus. Temporibus autem quibusdam, & aut officiis debitiss, aut rerum necessitatibus saepe eveniet, ut & voluptates repudiandae sint, & molestiae non recusandae. Itaque earum rerum hic tenetur a sapiente delectus, ut aut rejiciendis voluptatibus maiores alias consequatur, aut perferendis doloribus asperiores repellat.

Hanc ego cum teneam sententiam, quid 34
est, cur verear, ne ad eam non possim ac-
commadare Torquatos nostros? quos tu pau-
lo ante cum memoriter, tum etiam erga nos
amicie & benevole collegisti. nec me tamen
laudandis majoribus meis corrupisti, nec
segniorem ad respondendum reddisti. quo-
rum facta quemadmodum, quæso, interpre-
taris? Siccine eos censes aut in armatum
hostem impetum fecisse, aut in liberos, &
in sanguinem suum tam crudeles fuisse, nihil
ut de utilitatibus, nihil ut de commodis suis

cogitarent? At id ne feræ quidem faciunt, ut ita ruant, itaque turbent, ut, earum motus & impetus quo pertineant, non intelligamus. Tu tam egregios viros censes tantas res gessisse sine causa? Quæ fuerit causa, inox video: interea hoc tenebo: si ob aliquam causam ista, quæ sine dubio præclaræ sunt, fecerint, virtute in his ipsam per se causam non fuisse. Torquem detraxit hosti. & quidem se texit, ne interiret. At magnum periculum adiit. in oculis quidem exercitus. quid ex eo consecutus est? Laudem & caritatem; quæ sunt vitæ sine metu degendæ præsidia firmissima. Filium morte multavit: si sine causa, nolle me ab eo ortum, tam importuno tamque crudeli. si ut dolore suo fanciret militaris imperii disciplinam, exercitumque in gravissimo bello animadversionis metu contineret; saluti prospexit civium; 36 qua intelligebat contineri suam. Atque hæc ratio late patet. in quo enim maxime consuevit jactare vestra le oratio, tua præsertim, qui studiose antiqua persequeris, claris & fortibus viris commemorandis, eorumque factis non emolumento aliquo, sed ipsius honestatis decore laudandis, id totum evertitur eo delectu rerum, quem modo dixi, consti-

stituto, ut aut voluptates omittantur, majorum voluptatum adipiscendarum causa, aut dolores fascipientur, majorum dolorum effungiendorum gratia.

Sed de clarorum hominum factis illustribus & gloriiosis satis hoc loco dictum fit.³⁷ erit enim jam de omnium virtutum cursu ad voluptatem proprius differendi locus. Nunc autem explicabo, voluptas ipsa, quæ qualisque sit, ut tollatur error omnis imperitorum; intelligaturque ea, quæ voluptaria, delicata, mollis habeatur disciplina, quam gravis, quam continens, quam severa fit. Non enim hanc solam sequimur, quæ suavitate aliqua naturam ipsam movet, & cum jucunditate quadam percipitur sensibus, sed maximam illam voluptatem habemus, quæ percipitur, omni dolore detracto. Nam quoniam, cum privamur dolore, ipsa liberatione & vacuitate omnis molestiæ gaudemus; omne autem id, quo gaudemus, voluptas est, ut omne id, quo offendimur, dolor: doloris omnis privatio recte nominata est voluptas. Ut enim cum cibo & potione fames sitisque depulsa est, ipsa detractio molestiæ consecutionem affert voluptatis: sic in omni re doloris amotio successionem effi-

38 cit voluptatis. Itaque non placuit Epicuro, medium esse quiddam inter dolorem & voluptatem. illud enim ipsum, quod quibusdam medium videtur, cum omni dolore caret, non modo voluptatem esse, verum etiam summam voluptatem. Quisquis enim sentit, quemadmodum sit affectus, eum necesse est aut in voluptate esse, aut in dolore. Omnis autem privatione doloris putat Epicurus terminari summam voluptatem; ut postea variari voluptas, distinguique possit; augeri, amplificarique non possit. At etiam Athenis, ut a patre audiebam, facete & urbane Stoicos irridente, statua est in Ceramico Chrysippi, sedentis porrecta manu; quæ manus significet illum in hac esse rogatiuncula delectatum. Num quidnam manus tua sic affecta, quemadmodum affecta nunc est, desiderat? Nihil sane. At, si voluptas esset bonum, desideraret. Ita credo. Non est igitur voluptas bonum. Hoc ne statuam quidem dicturam pater ajebat, si loqui posset. Conclusum est enim contra Cyrenaicos satis acute; nihil ad Epicurum. Nam si ea sola voluptas esset, quæ quasi titillaret sensus, ut ita dicam, & ad eos cum suavitate afflueret, & illabetur; nec manus esse contenta posset ulla vacuitate doloris sine jucundo motu voluptatis.

fin autem summa voluptas est, ut Epicure placet, nihil dolere; primum tibi recte, Chrysippe, concessum est, nihil desiderare manum, cum ita esset affecta: secundum non recte, si voluptas esset bonum, fuisse desideraturam. idcirco enim non desideraret, quia, quod dolore caret, id in voluptate est.

Extremum autem esse bonorum voluptatem, ex hoc facile perspici potest. Constitua. ⁴⁰ mus aliquem magnis, multis, perpetuis fruentem & animo & corpore voluptatibus, nullo dolore nec impediente, nec impenden- te: quem tandem hoc statu præstabiliorum, aut magis expetendum possumus dicere? in- esse enim necesse est in eo, qui ita sit affectus, & firmitatem animi, nec mortem, nec dolorem timentis, quod mors sensu careat; dolor in longinquitate, levis; in gravitate, brevis soleat esse: ut ejus magnitudinem celeritas, diuturnitatem allevatio consoletur. Ad ea ⁴¹ cum accedit, ut neque divinum numen hor- reat, nec præteritas voluptates effluere pa- tiatur, earumque assidua recordatione læte- tur; quid est, quod huc possit, quod melius sit, accedere? Statue contra aliquem con- fectum tantis animi corporisque doloribus, quanti in hominem maximi cadere possunt,

nulla spe proposita , fore levius aliquando , nulla præterea nec præsentí , nec exspectata voluptate ; quid eo miserius dici aut fingi potest ? Quod si vita doloribus referta maxime fugienda est : summum profecto malum est , vivere cum dolore . cui sententiæ consentaneum est , ultimum esse bonorum cum voluptate vivere . Nec enim habet nostra mens quidquam , ubi confusat , tanquam in extre-
 mo : omnesque & metus & ægritudines ad dolorem referuntur : nec præterea est res ul-
 la , quæ sua natura aut sollicitare possit , aut
 42 angere . Præterea & appetendi , & refugien-
 di , & omnino rerum gerendarum initia pro-
 ficiuntur aut a voluptate , aut a dolore . quod
 cum ita sit , perspicuum est omnes rectas res
 atque laudabiles eo referri , ut cum volu-
 ptate vivatur . Quoniam autem id est vel sum-
 mum bonum , vel ultimum , vel extremum ,
 quod Græci τέλος nominant , quod ipsum nul-
 lam ad aliam rem , ad id autem res referun-
 tur omnes ; fatendum est , summum esse bo-
 num jucunde vivere .

13 Id qui in una virtute ponunt , splendore nominis capti , quid natura postulet , non in-
 telligunt ; errore maximo , si Epicurum au-
 dire voluerint , liberabuntur . Istæ enim ve-

stræ eximiæ pulchræque virtutes, nisi voluptatem efficerent, quis eas aut laudabiles, aut expetendas arbitraretur? Ut enim medicorum scientiam non ipsius artis, sed bonæ valetudinis causa probamus; & gubernatoris ars, quia bene navigandi rationem habet, utilitate, non arte laudatur: sic sapientia, quæ ars vivendi putanda est, non expetetur, si nihil efficeret; nunc expetitur, quod est tanquam artifex conquirendæ & comprandæ voluptatis. Quam autem dicam voluptatem jam videris, ne invidia verbi labe-factetur oratio mea. nam cum ignorantia rerum bonarum & malarum maxime hominum vita vexetur; ob eumque errorem & voluptatibus maximis sæpe priventur, & gravissimis animi doloribus torqueantur; sapientia est adhibenda, quæ & terroribus, cupiditatibusque detractis, & omnium falsarum opinionum temeritate demta, certissimam se nobis ducem præbeat ad voluptatem. Sapientia enim est una, quæ moestitiam pellat ex animis; quæ nos exhorrescere metu non sinat; qua præceptrice, in tranquillitate vivi potest, omnium cupiditatum ardore restincto. Cupiditates enim sunt insatiabiles: quæ non modo singulos homines, sed universas fami-

lias evertunt; totam etiam labefactant s^epe
44 rempublicam. Ex cupiditatibus odia, dissiden-
tia, discordia, seditiones, bella nascuntur:
nec hae sese foris solum jactant, nec tantum
in alios cæco impetu incurront; sed intus
etiam in animis inclusæ inter se dissident at-
que discordant. ex quo vitam amarissimam
necessæ est effici: ut sapiens solus, amputa-
ta circumcisione inanitate omni & errore,
naturæ finibus contentus, sine ægritudine
45 possit, & sine metu vivere. Quæ est enim
aut utilior, aut ad bene vivendum aptior
partitio, quam illa, qua est usus Epicurus?
qui unum genus posuit earum cupiditatum,
quæ essent & naturales & necessariæ: al-
terum, quæ naturales essent, nec tamen
necessariæ: tertium, quæ nec naturales,
nec necessariæ. quarum ea ratio est, ut ne-
cessariæ nec opera multa, nec impensa ex-
46 pleantur. Ne naturales quidem multa desiderant,
propterea quod ipsa natura divitias,
quibus contenta fit, & parabiles, & termi-
natas habet. inanum autem cupiditatum nec
14 modus ullus, nec finis inveniri potest. Quod
si vitam omnem perturbari videmus errore &
inscientia; sapientiamque esse solam, quæ
nos a libidinum impetu & formidinum ter-

rore vindicet, & ipsius fortunæ modice ferre doceat injurias, & omnes monstrat vias, quæ ad quietem & tranquillitatem ferant; quid est, cur dubitemus dicere, & sapientiam propter voluptatem expetendam, & insipientiam propter molestias esse fugiendam? Eademque ratione ne temperantiam quidem⁴⁷ propter se expetendam esse dicemus, sed quia pacem animis afferat, & eos quasi concordia quadem placet ac leniat. Temperantia est enim, quæ in rebus aut expetendis, aut fugiendis, rationem ut sequamur monet. nec enim satis est judicare, quid faciendum, non faciendumve sit; sed stare etiam oportet in eo, quod sit judicatum. Plerique autem, quod tenere atque servare id, quod statuerunt, non possunt, vicii & debilitati, objecta specie voluptatis, tradunt se libidinibus constringendos, nec, quid eventurum sit, provident, ob eamque causam propter voluptatem & parvam & non necessariam, & quæ vel alter pararetur, & qua etiam carere possent sine dolore, tum in morbos graves, tum in damna, tum in dedecora incurront: saepe etiam legum judiciorumque poenis obligantur. Qui autem ita frui volunt voluptatibus,⁴⁸ ut nulli propter eas dolores consequantur;

¶68 DE FINIB. BONOR. ET MALOR.

& qui suum judicium retinent, ne voluptate victi faciant id, quod sentiunt non esse faciendum: hi voluptatem maximam adipiscuntur, prætermittenda voluptate. Iudeu etiam dolorem sæpe perpetiuntur, ne, si id non faciant, incident in majorem. Ex quo intelligitur, nec intemperantiam propter se fugiendam esse: temperantiamque expetendam, non quia voluptates fugiat, sed quia
I5 majores consequatur. Eadem fortitudinis
⁴⁹ratio reperietur: nam neque laborum perfunctio, neque perpessio dolorum, per se ipsa allicit; nec patientia, nec assiduitates, nec vigiliæ, nec ea ipsa, quæ laudatur, industria, ne fortitudo quidem: sed ista sequimur, ut sine cura metuque vivamus; animumque & corpus, quantum efficere possimus, molestia liberemus. Ut enim mortis metu omnis quietæ vitæ status perturbatur; &, ut succumbere doloribus, eosque humili animo imbecilloque ferre, miserum est; ob eamque debilitatem animi, multi parentes, multi amicos, nonnulli patriam, plerique autem se ipsos penitus perdiderunt: sic robustus animus & excelsus, omni est liber cura & angore, cum & mortem contemnit, qua qui affecti sunt, in eadem causa sunt, qua an-

tequam nati: & ad dolores ita paratus est,
ut meminerit, maximos morte finiri, par-
vos multa habere intervalla requietis, medio-
crium nos esse dominos: ut, si tolerabiles
sint, feramus; sin minus, æquo animo e vi-
ta, cum ea non placeat, tanquam e theatro,
exeamus. Quibus rebus intelligitur, nec ti-
miditatem ignaviamque vituperari, nec for-
titudinem patientiamque laudari suo nomine:
sed illas rejici, quia dolorem pariant; has
optari, quia voluptatem. Justitia restat, ut 16
de omni virtute sit dictum; sed similia fere 50
dici possunt. Ut enim sapientiam, temperan-
tiam, fortitudinem, copulatas esse docui-
cum voluptate, ut ab ea nullo modo nec di-
velli, nec distrahi possint; sic de justitia ju-
dicandum est: quæ non modo nunquam no-
cet cuiquam, sed contra semper alit aliquid
tum vi sua atque natura, quod tranquillet
animos, tum spe, nihil earum rerum defu-
turum, quas natura non depravata desideret.
Quemadmodum temeritas, & libido, & ig-
navia semper animum excruciant, & sem-
per sollicitant, turbulentæque sunt: sic cum
vis in mente consedit, hoc ipso, quod adest,
turbulenta non potest fieri; & si vero molita
quippiam est, quamvis occulte fecerit, nun-

170 DE FINIB. BONOR. ET MALOR.

quam tamen confidet id fore semper occul-
tum. Plerumque improborum facta primo
suspicio insequitur; deinde sermo atque fama;
tum accusator, tum judex: multi etiam, ut
51 te consule, ipsi se indicaverunt. Quod si
qui satis sibi contra hominum conscientiam
septi esse & muniti videntur, deorum tamen
horrent, easque ipsas sollicitudines, quibus
eorum animi noctes atque dies exeduntur,
a diis immortalibus supplicii causa importa-
ri putant. Quæ autem tanta ex improbe fa-
ctis ad minuendas vitæ molestias accessio fie-
ri potest, quanta ad augendas, cum conscienc-
tia factorum, tum pena legum, odioque ci-
vium? Et tamen in quibusdam neque pecu-
niæ modus est, neque honoris, neque impe-
rii, nec libidinum, nec epularum, nec reli-
quarum cupiditatum: quas nulla præda un-
quam improbe parta minuit, sed auget po-
tius atque inflamat: ut coercendi magis,
52 quam dedocendi esse videantur. Invitat igi-
tur vera ratio bene sanos ad justitiam, æqui-
tatem, fidem: neque homini infanti atque
impotenti injuste facta conducunt; qui nec
facile efficere possit, quod conetur, nec ob-
tinere, si effecerit: & opes vel fortunæ, vel
ingenii, liberalitati magis convenient; qua-

qui utuntur, benevolentiam sibi conciliant,
& quod aptissimum est ad quiete vivendum,
caritatem; præsertim cum omnino nulla sit
causa peccandi. Quæ enim cupiditates a na- 53
tura proficiscuntur, facile explentur sine ul-
la injuria: quæ autem inanes sunt, his pa-
rendum non est. Nihil enim desiderabile con-
cupiscunt, plusque in ipsa injuria detrimen-
ti est, quam in iis rebus emolumenti, quæ
pariuntur injuria. Itaque ne justitiam qui-
dem recte quis dixerit per se ipsam optabi-
lem, sed quia jucunditatis vel plurimum affe-
rat. Nam diligi & carum esse, jucundum est,
propterea, quia tutiorem vitam & volunta-
tem efficit pleniorum. Itaque non ob ea so-
lum incommoda, quæ eveniunt improbis,
fugiendam improbitatem putamus, sed mul-
to etiam magis, quod cuius in animo versa-
tur, nunquam sinit eum respirare, nunquam
acquiescere. Quod si ne ipsarum quidem vir- 54
tutum laus, in qua maxime ceterorum phi-
losophorum exultat oratio, reperire potest
exitum, nisi dirigatur ad voluptatem; vo-
luptas autem est iola, quæ nos vocet ad se,
& alliciat suapte natura: non potest esse du-
biuum, quin id sit summum atque extremum
bonorum omnium; beateque vivere, nihil

I7 aliud sit, nisi cum voluptate vivere. Huic certæ stabilique sententiae quæ sunt conjuncta, explicabo brevi.

55 Nullus in ipsis error est finibus bonorum & malorum, id est, in voluptate, aut in dolore: sed in his rebus peccant, cum, e quibus hæc efficiantur, ignorant. Animi autem voluptates & dolores nasci fatemur e corporis voluptatibus & doloribus. Itaque concedo quod modo dicebas, cadere causa, si qui e nostris aliter existimant; quos quidem video esse multos, sed imperitos. Quamquam autem & lætitiam nobis voluptas animi, & molestiam dolor afferat; eorum tamen utrumque & ortum esse e corpore, & ad corpus referri: nec ob eam causam non multo maiores esse & voluptates, & dolores animi, quam corporis. Nam corpore nihil, nisi præsens, & quod adest, sentire possumus; animo autem, & præterita, & futura. Ut enim æque doleamus animo, cum corpore dolemus: fieri tamen permagna accessio potest, si aliquod æternum & infinitum impendere malum nobis opinemur. quod idem licet transferre in voluptatem, ut ea major
56 sit, si nihil tale metuamus. Jam illud quidem perspicuum est, maximam animi aut

voluptatem, aut molestiam plus aut ad beatam, aut ad miseram vitam afferre momenti, quam eorum utrumvis, si æque diu sit in corpore. Non placet autem, detracta voluptate, ægritudinem statim consequi, nisi in voluptatis locum dolor forte succeſſerit: at contra, gaudere nosmet omittendis doloribus, etiam si voluptas ea, quæ ſenſum moveat, nulla ſucceſſerit: eoque intelligi potest, quanta voluptas fit non dolere. Sed ut iis bonis erigimur, quæ exſpectamus: ſic lætamur iis,⁵⁷ quæ recordamur. Stulti autem malorum memoria torquentur: sapientes bona præterita, grata recordatione renovata, delectant. Eſt autem ſitum in nobis, ut & adverſa quaſi perpetua oblivione obruamus, & ſecunda ju-¹⁸cunde ac ſuaviter meminerimus. Sed cum ea, quæ præterierunt, acri animo & atten-
to intuemur, tunc fit, ut ægritudo ſequa-
tur, ſi illa mala ſint; lætitia, ſi bona. O
præclarum beate vivendi, & apertam, &
ſimplicem, & directam viam! cum enim cer-
te nihil homini poſſit melius eſſe, quam va-
care omni dolore & moleſtia, perfruique ma-
ximis & animi & corporis voluptatibus; vi-
detisne, quam nihil prætermittatur, quod
vitam adjuvet, quo facilius id, quod pro-
positum eſt, ſummum bonum conſequa-

mur? Clamat Epicurus, is, quem vos nimis
voluptatibus esse deditum dicitis, non posse
jucunde vivi, nisi sapienter, honeste, juste-
que vivatur; nec sapienter, honeste, juste,
58 nisi jucunde. Neque enim civitas in seditio-
ne, beata esse potest, nec in discordia domi-
norū domus: quo minus animus a se ipse
dissidens tecumque discordans, gustare par-
tem ullam liquidæ voluptatis & liberæ potest.
atqui pugnantibus & contrariis studiis consi-
liisque semper utens, nihil quieti videre, ni-
59 hil tranquilli potest. Quod si corporis gra-
vioribus morbis vitæ jucunditas impeditur;
quanto magis animi morbis impediri neceſſe
est? Animi autem morbi sunt cupiditates im-
menſæ & inanes, divitiarum, gloriæ, domi-
nationis, libidinosarum etiam voluptatum.
Accedunt ægritudines, molestiæ, moerores,
qui animos exedunt conficiuntque curis, ho-
minum non intelligentium, nihil dolendum
esse animo, quod fit a dolore corporis præ-
fenti futurove sejunctum. Nec vero quis-
quam stultus non horum morborum aliquo
laborat. Nemo igitur est eorum non miser.
60 Accedit etiam mors, quæ quasi saxum Tan-
talo, semper impendet: tum supersticio; qua
qui est imbutus, quietus esse nunquam potest.

Præterea bona præterita non meminerunt, præsentibus non fruuntur, futura modo expectant; quæ quia certa esse non possunt, conficiuntur & angore, & metu: maximeque cruciantur, cum sero sentiunt, frustra se aut pecuniæ studuisse, aut imperiis, aut opibus, aut gloriæ. Nullas enim consequuntur voluptates, quarum potiendi spe inflammati, multos labores magnosque susceperant. Ecce autem alii minuti & angusti, aut omnia ⁶¹ semper desperantes, aut malevoli, invidi, difficiles, lucifugi, maledici, monstrosi: alii autem etiam amatoriis levitatibus dediti, alii petulantes, alii audaces, protervi, idem intemperantes, & ignavi, nunquam in sententia permanentes. quas ob causas in eorum vita nulla est intercapedo molestiæ. Igitur neque stultorum quisquam beatus, neque sapientum non beatus, multoque hoc melius nos veriusqne, quam Stoici. Illi enim negant bonum quidem esse, nisi nescio quam illam umbram, quod appellant hoc estum, non tam solido, quam splendido nomine: virtutem autem nixam hoc honesto, nullam requirere voluptatem, atque ad beate vivendum selsa esse contentam. Sed possunt hæc ¹⁹ quadam ratione dici, non modo non repag- ⁶²

nantibus, verum etiam approbantibus nobis. Sic enim ab Epicuro sapiens semper beatus inducitur. finitas habet cupiditates; negligit mortem; de diis immortalibus sine ullo me-
tu sentit; non dubitat, si ita melius sit, mi-
grare de vita. his rebus instructus semper est
in voluptate. Neque enim tempus est ullum,
quo non plus habeat voluptatum, quam do-
lorum. nam & præterita grate meminit, &
præsentibus ita potitur, ut animadvertis,
quanta sint ea, quamque jucunda: neque
pendet ex futuris, sed exspectat illa, fruitur
præsentibus: ab iisque vitiis, quæ paulo an-
te collegi, abest plurimum: &, cum stulta-
rum vitam cum sua comparat, magna affici-
tur voluptate. Dolores autem, si qui incur-
runt, nunquam vim tantam habent, ut non
plus habeat sapiens, quod gaudeat, quam
63 quod angatur. Optime vero Epicurus, quod
exiguam dicit fortunam intervenire sapienti:
maximasque ab eo, & gravissimas res consilio
ipsius & ratione administrari: neque majorem
voluptatem ex infinito tempore aetatis percipi
posse, quam ex hoc percipiatur, quod videa-
mus esse finitum. In dialectica autem vestra
nullam vim existimavit esse nec ad melius vi-
vendum, nec ad commodius differendum.

In

In physicis plurimum posuit. Ea scientia, & verborum vis, & natura orationis, & consequentium repugnantiumve ratio potest perspici: omnium autem rerum natura cognita, levamur superstitione, liberamur mortis metu, non conturbamur ignoratione rerum, e qua ipsa horribiles existunt saepe formidines. denique etiam morati melius erimus, cum didicerimus, quae natura desideret. Tum vero, si stabilem scientiam rerum tenebimus, servata illa (quae quasi delapsa de cœlo est ad cognitionem omnium) regula, ad quam omnia judicia rerum dirigentur, nunquam ullius oratione vici sententia desistemus. Ni-
fi autem rerum natura perspecta erit, nullo modo poterimus sensuum judicia defendere. Quidquid porro animo cernimus, id omne oritur a sensibus: qui si omnes veri erunt, ut Epicuri ratio docet, tum denique poterit aliquid cognosci & percipi. quos qui tollunt, & nihil posse percipi dicunt, ii, remotis sensibus, ne id ipsum quidem expedire possunt, quod differunt. Præterea, sublata cognitione & scientia, tollitur omnis ratio & vitæ degendæ, & rerum gerendarum. Sic e physice & fortitudo sumitur contra mortis timorem; & constantia contra metum religio-

nis; & sedatio animi, omnium rerum occul-
tarum ignoratione sublata; & moderatio,
natura cupiditatum generibusque earum ex-
plicatis; & (ut modo docui) cognitionis re-
gula & judicio ab eadem illa constituto, ve-
ri a falso distinctio traditur.

20 Restat locus huic disputationi vel maxi-
65 me necessarius de amicitia, quam, si volu-
ptas summum fit bonum, affirmatis nullam
omnino fore: de qua Epicurus quidem ita di-
cit: *omnium rerum, quas ad beate vivendum*
sapientia comparaverit, nihil esse majus ami-
citia, nihil uberior, nihil jucundius. Neque
vero hoc oratione solum, sed multo magis
vita, & factis & moribus comprobavit. quod
quam magnum sit, fictæ veterum fabulæ de-
clarant; in quibus tam multis tamque variis,
ab ultima antiquitate repetitis, tria vix ami-
corum paria reperiuntur, ut ad Orestem per-
venias, profectus a Theseo. At vero Epi-
curus una in domo, & ea quidem angusta,
quam magnos, quantaque amoris conspira-
tione consentientes tenuit amicorum greges?
66 quod fit etiam nunc ab Epicureis. Sed ad
rem redeamus. de hominibus dici non neces-
se est. Tribus igitur modis video esse a no-
stris de amicitia disputatum. Alii, cum eas

voluptates, quæ ad amicos pertinerent, negarent esse per se ipsas tam expetendas, quam nostras expeteremus; quo loco videatur quibusdam stabilitas amicitiae vacillare. tuentur tamen eum locum, seque facile, ut mihi videtur, expedient. ut enim virtutes, de quibus ante dictum est, sic amicitiam negant posse voluptate disceders. Nam cum solitudo, & vita sine amicis, insidiarum & metus plena sit, ratio ipsa monet, amicitias comparare; quibus partis confirmatur animus, & a spe pariendarum voluptatum sequngi non potest. Atque ut odia, invidiae,⁶⁷ despicationes, adversantur voluptatibus: sic amicitiae non modo faunices fidelissimæ, sed etiam effectrices sunt voluptatum, tam amicis, quam sibi. quibus non solum præsentibus fruuntur, sed etiam spe eriguntur consequentis ac posteri temporis. Quod quia nullo modo sine amicitia firmam & perpetuam jucunditatem vitae tenere possumus, neque vero ipsam amicitiam tueri, nisi æque amicos ac nosmetipos diligamus; idcirco & hoc ipsum efficitur in amicitia, & amicitia cum voluptate connectitur. nam & lætamur amlcorum lætitia æque atque nostra, & pariter dolemus angoribus.

68 Quocirca eodem modo sapiens erit affe-
ctus erga amicum, quo in seipsum: quosque
labores propter suam voluptatem fusciperet,
eosdem fuscipiet propter amici voluptatem:
quæque de virtutibus dicta sunt, quemad-
modum hæ semper voluptatibus inhærent,
eadem de amicitia dicenda sunt. Præclare
enim Epicurus his pæne verbis: *Eadem, in-*
quit, scientia confirmavit animum, ne quod
aut sempiternum, aut diuturnum timeret ma-
lum; quae perspexit, in hoc ipso vitae spatio
69 *amicitiae praesidium esse firmissimum.* Sunt
autem quidam Epicurei timidores paulo con-
tra vestra convicia, sed tamen satis acuti,
qui verentur, ne, si amicitiam propter no-
stram voluptatem expetendam putemus, tota
amicitia quasi claudicare videatur. Itaque
primos congressus, copulationesque & con-
suetudinum instituendarum voluntates fieri
propter voluptatem: cum autem usus pro-
grediens familiaritatem efficerit, tum amo-
rem efflorescere tantum, ut, si nulla sit utilitas
ax amicitia, tamen ipsi amici propter se
ipsos amentur. Etenim si loca, si fana, si ur-
bes, si gymnasia, si campum, si canes, si
equos, si ludicra exercendi aut venandi, con-
suetudine ad amare solemus; quanto id in ho-

minum consuetudine facilius fieri poterit,
& justius? Sunt autem, qui dicant, foedus⁷⁰
quoddam esse sapientum, ut ne minus qui-
dem amicos, quam se ipsos diligent. quod
& fieri posse intelligimus, & saepe id vide-
mus: & perspicuum est, nihil ad jucunde vi-
vendum reperiri posse, quod conjunctione ta-
li sit aptius. Quibus ex omnibus judicari
potest, non modo non impedire rationem
amicitiæ, si summum bonum in voluptate
ponatur, sed sine hoc institutionem amicitiae
omnino non posse reperiri.

Quapropter si ea, quæ dixi, sole ipso il-²¹
lustriora & clariora sunt: si omnia dixi, hau-⁷¹
sta e fonte naturæ: si tota oratio nostra
omnem sibi fidem sensibus confirmat, id est,
incorruptis atque integris testibus: si insan-
tes pueri, si mutæ etiam bestiæ pæne lo-
quuntur, magistra ac duce natura, nihil esse
prosperum, nisi voluptatem, nihil asperum,
nisi dolorem; de quibus neque depravate ju-
dicant, neque corrupte: nonne ei maximam
gratiæ habere debemus, qui hac exaudita
quasi voce naturæ, sic eam firme graviterque
comprehenderit, ut omnes bene sanos in viam
placatae, tranquillæ, quietæ, beatæ vitæ
deduceret? qui quod tibi parum videtur eru-

ditus, ea causa est, quod nullam eruditio-
nem esse duxit, nisi quæ beatæ vitæ discipli-
nam juvaret. An ille tempus aut in poetis
evolvendis, ut ego & Triarius, te hortato-
re, facimus, consumeret? in quibus nulla so-
lida utilitas, omnisque puerilis est delecta-
tio: aut se, ut Plato, in musicis, geometria,
numeris, astris contereret? quæ & a falsis
initiis profecta, vera esse non possunt; &
si essent vera, nihil afferrent, quo jucundius,
id est, quo melius viveremus. Eas ergo ar-
tes persequeretur; vivendi artem tantam,
tamque operosam, & perinde fructuosam re-
linqueret? Non ergo Epicurus ineruditus,
sed ii indocti, qui, quæ pueros non didicisse
turpe est, ea patent usque ad senectutem
esse discenda. Quæ cum dixisset, explica-
vi, inquit, sententiam meam, & eo quidem
consilio, tuum judicium ut cognoscerem.
quæ mihi facultas, ut id meo arbitratu-
serem, ante hoc tempus nunquam est data.
